

Historia di literatura Arubano y Antiyano:

ORANJESTAD(AAN)- Wim Rutgers, ex-docente di Colegio Arubano y actualmente trahando como investigador na Universidad di Utrecht, Hulanda, a tene un lectura cu e titulo aki den auditorio di Universidad di Aruba dia 8 di Maart pasa. Un lectura organiza pa Biblioteca Nacional y Universidad di Aruba mes. Cu e titulo di e lectura aki, Wim Rutgers tabata referi na e articulo bon conoci di Cola Debrot ariba e topico aki di 1977.

Den e prome parti di su lectura, Wim Rutgers a trata e logronan y a duna un vista general di skirbimento di historia di literatura Arubano y Antiyano. Aki a trata en especial e pregunta, ta kico ta worde considera como literatura Arubano y Antiyano: solamente literatura na Papiamento of

tambe literatura na otro idioma manera Spaño, Hulandes of Ingles, skirbi door di Arubianonan of Antiyanonan y literatura tocante Aruba of Antiyas? Ora di contesta e pregunta aki - asina asina cu tin contesta pe - a toca tambe e pregunta, ta kico ta exactamente historia di literatura.

Wim Rutgers a splica bon cla cu e asercamento tradicional di historia di literatura ta incompleto. Esta e referencia na algun autor grandi, ordenamento di esakinan y nan obranan den movimientonan literario, nan biografia y nan bibliografia y en especial e ponemento di un of otro relacion entre nan bida y nan obranan.

Segun Rutgers, ta un parti di e tereno so ta worde investiga di e forma aki. Siguiendo e aser-

camento di investigadornan empirico di literatura, Rutgers tambe kier pone atencions riba henter e comunicacion literario e produccion, e distribucion y e consumo di obranan literario.

E asercamento aki ta tene cuenta cu tur tereno y aspecto cu tin di haber cu e structura di e organizacion literario: e publicadornan, e imprentanan, e revistanan di literatura, e bibliotecanan y organizacionnan cultural como distribuidornan di literatura, e rol di criticonan literario y enseñanza literario pa e aceptacion di e

obranan literario, etc. Un pregunta cu Rutgers ta haci su mes ta pesey: ta con e organizacion literario y docentenan di literatura ta esnan cu ta traha e reglanan di literatura bibo.

Continuamente tin cambionan den e reglanan literario aki. Asina por ehempel autornan Hulandes no-Antiyanos of no-Arubano cu tabata skirbi tocante Aruba of Antiyas, anteriormente si tabata worde considera como parti di literatura Arubano/Antiyanos, pero awor no mas.

Asina tambe literatura Hulandes skirbi door di Arubianonan

of Antiyanonan tampoco ta worde considera parti di literatura Hulandes. Tambe sa menciona den hopi historia di literatura, nombrenan di autornan cu casi no ta worde leza mas. Nan ta pertenece ainda na e tradicion literario bibo cu e reglanan literario ta asumi?

E logronan cu Rutgers a referi na dje, di mes a hibe na e fayonan. Cu e poema "Atardi" di

J.S. Corsen, di 1905, el a demostra un biaha mas ta kico e kier logra cu "buscamento di un modelo pa descripcion di literatura Arubano/Antiyanos".

Cursonan Venezolano ta bay cuminza

ORANJESTAD(AAN)- Gobierno di Venezuela atravez di Instituto Venezolano para la cultura y Cooperacion na Aruba ta bay duna inicio na e cursonan den cuadro di programa di cooperacion pa aña 90.

E promer curso ta conservacion de libros y archivos. E curso aki

ta dura un luna cu cooperacion di Biblioteca Nacional y Archivo Historico di Aruba.

Sra. Carmen Villegas de Lopez di Venezuela lo duna e curso aki. Ya caba diferente persona a inscribi pa participa na e curso aki. Sra. Villegas a yega Aruba ayera pa dicta e curso menciona.

Rosacruznan ta celebra rituo antiguo di aña nobo

ORANJESTAD(AAN)- E revalidacion di un ceremonia cu a principia den e antiguo Egipto, mas o menos cuarenta centenares pasa, lo ta e punto culminante di un conclave local di e Rosacruznan, cu lo tuma lugar na Aruba.

Di acuerdo cu sr. C. Dake, maestro actual di e Capitulo Rosacruz AMORC di Aruba pa e aña Rosacruz 3342, e antiguo Egipciano desde e tempo di

Memphis te na e periodo Ptolemaic, a principia nan aña nobo mas o menos na e tempo di e equinoxio vernal, ora cu e solo a cruza e equatorio celestial y ta drenta den e signo zodiacal di Aries, caminda di dia y anochi ta dura mes un largo. Esaki ta sosode semper ariba o rond di dia 20 di Maart cu na Egipto ta significa e yegada di verano.

Esnan bibando den e hemisferio meridional, y cu por lo tanto no por experiencia e binimento di verano, na e ocasion aki simbolicamente ta perpetua e transicion den e temporada. E periodo aki ta worde considera e comienzo di un aña nobo y ta simbolisa bida nobo.

E Ordo Rosacruz, conoci ariba henter mundo como AMORC, ta existi den tur paisnan civiliza y ta un fraternidad no-religioso di homber y muhernan cu ta dedica nan mes na investigacion, estudio y aplicacion di leyman di naturaleza y leyman spiritual. Pa su origen ta bay atras den e periodo di soberania di Farao Akhnaton, 1350 prome cu Cristo.

E Ordo ta conmemora e antiguo celebracion di e aña nobo na un manera simbolico, den cual celebrantenan ta participa cu alimentonan simpel consistiendo di cierto elementonan basico di naturaleza, tal manera: salo, maishi y juice di drui no fermenta.

E oficialnan nobo di e capitulo di AMORC local kendenan lo worde instala ta: Srta. I Weller, maestra, Sra. G. Mathilda, maestra reemplasante, Sr. P. Denz, presidente di bestuur, Sra. M. Oei, Madre, Sr. M.H.A. Jeffrey, chaplain, Sra. M. Winterdal, guardian, Srta. M. de Mey, guardian, Sr. A. de Gomez, Chanter, Sra. C. Mathilda, Chantress.

E ceremonia lo tuma lugar den e edificio di e capitulo di AMORC, na Savaneta 202, Diadomingo dia 25 di Maart 1990 pa 10'or di mainta.

Tur miembro di e gran Logia, e capitulo local, di e Pronaos y capitulonan di e islanan den Caribe, ta worde invita pa celebra e rituo tan inspira aki.



OFERTA SPECIAL

Cu cada compra di un Dinner di

2, 3, of 5 pida galiña, bo ta haya

un botter -(16oz)- di Pepsi gratis

Cu compra di

9, 15 of 21 pida galiña, bo ta haya

un 6-Pack -(16oz)- di Pepsi gratis

E oferta aki ta valido

cuminzando maart 10 te

cu maart 25, 1990.

Kentucky Fried Chicken

We do chicken right.



ANTRACO ARUBA N.V.

tin mester di:

* **DRIVER**

* **HELPER**

Pa solicita, pasa personalmente durante oranan di oficina. Por favor trece portret.

ANTRACO ARUBA N.V.

L.G. Smith Boulevard 126 Tel. 23434